

TUSAGASSIUUTITIGUT NALUNAARUT

Ukioq 2012-mut missingersuutit ukiut missingersuussiorfiusut ilanngullugit Kommune Kujallermi akuersissutigineqarput.

Qaammatit kingulliit ukiumut missingersuutit pillugit atorfilittat ataatsimiititalianilu ilaasortat ula-paarsimaqaat, kommunip ingerlanneqarniarnera pillugu ukioq 2012-mi aamma annertuumik sipaarniartoqartussaammat. Sipaarniarnermi meeqqat, inuusuttuaqqat, utoqqaat inuiaqatigiinnilu sanngiinnerusortagut eqqorniarneqarsimangillat, inuit qitiutillugit sullissinissaq pingaartinneqar-mat. Sipaarniarnermi Ingerlatsiviit tamangajammik sipaarfigineqaraluartut innuttaasunut sullissi-neq sapinngisamik pitsaasuutinniarneqarpoq naak aningaasat katillugit 18 mio. kr-it sinnilaarlugit sipaarutigineqaraluartut.

Atuartut atuarfinnilu nerisitsisarneq sipaarniarnitsinni eqqornaveersaarnissaat iluatsissimavarput, soorluttaa q sipaarniarnermi inunnik isumaginnoqarfimmi tunngasutigut taamaattoqarsimasoq. Sipaarniarnerruttaaq nalaani sulisut namminneerlutik suliunnaaraangata atorfinnik allanngortite-risarneq iluaqutigalugu sulisunik soraasitsisoqarsimangilaq.

Inuussutissarsiornermut – suliffissaqartitsiniarnermullu aningaasat piginnaanngorsaaqqiisitsiner-mut atorneqarnissaat ukioq mannatuut suli aalajangiusimaneqarpoq. Sulilersussanik pikkorissar-titsiuartarnissaq taamatullu piginnaanngorsaaajuartarnissaq pisariaqarmat.

Sanaartugassat eqqarsaatigalugit ukioq 2012-mut Namminersorlutik Oqartussat 344 mio. kr-it sinnerlugit sanaartugassanut illoqarfinnut Nanortalimmut, Qaqortumut Narsamullu aningaasa-liissutigaa Kommune Kujallermit suliffissatigut sunniuteqarluartussa q. Narsami atuarfiup nutar-terneqarnissaata ukiuni marlunni kinguartinneqarallartoq ajuusaarutigigaluarlugu Namminer-sorlutik Oqartussani 2014-mi aningaasaliisoqareersimanera nuannaarutigaaqarput.

Kommunip akileraarutigut isertittagai appariartornikuupput taamaattumik atorniartariaqarsima-vugut taarsertariaqakkatsinnik 59,1 mio. kr.-it ukiuni sisamani akilersorneqartussat.

Tassunga atatillugu suli naalakkersuisut akileraarutinik naligiissaarinermi aaqqissuussineq nutaaq il. il. allanngortitsiniarnermik suliniuteqarneq qilanaaraarput, taamaalilluni kommunit aningaasatigut ajornartorsiortut massakkumut ajunnginnerusumik isumagineqalernissammata. Kommunit aningaasaqarnerisa assigiinngissutaat maannakkutut ingerlasoq naligiinneru-sariaqarpoq kommunini kiffartuussinerup assigiinnginnerujussua pinngitsoortinniarlugu.

Kommunimi suliffissaaleqineq annertoqaaq, inuillu ikiliartorput, taamaattumik isumalluarpu-gut, pilersaarutit naapertorlugit 2012-mi aatsitassarsiornerup aallartisarneqarneranut pilersaarute-qartunut, taamaaliornikkut aningaasatigut inissisimanerput illorraap tungaanut sangutissin-naamassuk.

Suut tamaasa kalluarlugit sipaarniarnerrup ingerlassimavarput, taamaasilluta pinngitsoortissinnaa-simallugu akileraarutip qaffanngitsoornissaa. Akileraarut allannguuteqarani 2012-mi 28 %-ussaaq ,

nuna tamakkerlugu akileraarut 11 % aammalu kommunenut akileraarutaat 6 % katillugu 45 %-
ussaaq.

Naggataatsigut Kommunalbestyrelsip missingersuussiornerani, aatsaat taama sakkortutigisumi
misigisaqarfiusumi, suleqataasimasut tamaasa qutsavigerusuppakka.

Kommune Kujalliup aaqqissuussaanera, nunaqarfiit aammalu ingerlatsiviit nutaamik nalimmas-
sarneqarnissaat 2012-mi februaarip qaammataani nutaamik eqqarsarnermik tunngavilik inger-
lanneqassaaq.

Simon Simonsen
Borgmester

Oqarasuaat: 49 33 17